

Nunalerinerup iluani imminut pilersorneq siuarsarneqarsinnaaqqullugu 2015-imut aningaasanut inatsisissami 5 mio. kr.-inik immikkoortitsinissamik Naalakkersuisut sulissuteqaqqullugit Inatsisartut aalajangiiffigisassaattut siunnersuut.

(Inatsisartuni ilaasortaq Aqqaluaq B. Egede, Inuit Ataqtigii)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Aappassaaneqarnera

Ataatsimiititap isumaliutersuussutaanut qujarusuppunga.

Inatsisartunut ilaasortaq Aqqaluaq B. Egede nunalerinerup iluani imminut pilersorneq siuarsarneqarsinnaaqqullugu 2015-imut aningaasanut inatsisissami 5 mio. kr.-inik immikkoortitsinissamik Naalakkersuisut sulissuteqaqqullugit Inatsisartut aalajangiiffigisassaattut siunnersuuteqarpoq. Naalakkersuisut siunnersuut tapersersorumagaluarlugu itigartinneqarnissaa inasutigaat Nunalerineq pillugu Ataatsimiititaliarsuup isumaliutissiissutaanut suli saqqummiunneqanngitsumut innersuussillutik.

Maluginiarpara Aalisarnermut, Piniarnermut Nunalerinermullu Ataatsimiititaliaq *Kalaallit Nunaanni nunalerinerup aningaasaqarniarnera 2008* aamma *Aningaasaqarnikkut ingerlatsineq pillugu nalunaarusiaq 2014* pillugit suliniaqatigiinnut innersuussillutik inerniliipput ”Kalaallit Nunaanni nunalerinerup tapersersorneqarnissaanut ineriartortinnissaanullu 2015-imut Aningaasanut Inatsisikkut minnerpaamik 15 mio. kr.-nik aningaasaliinissamut Naalakkersuisut peqquneqassasut”.

Tamatumunnga tunngatillugu erseqqissaatigineqassaaq inassuteqaatigineqartoq 2015-imi aningaasaqarnermut inatsimmut sinaakkutaliunneqartut iluini, maannamut ajornakusoorfiulereersumut aningaasalerneqassammat. Nunalerinermut aningaasaliissutit annertuumik qaffaagineqarnerat, aningaasaqarnermut inatsisissamut siunnersuutip Inatsisartut ukiaanerani ataatsimiinneranni suliarineqarnerani, Inatsisartut Aningaasaqarnermut Akilaartarnermullu Ataatsimiititaliaat Inatsisartullu tamarmiullutik pingaarnersiueqataaffigisinnaasaanni, ataatsimut pingaarnersiunikkut tunngaviumik suliarineqartariaqarpoq.

Ataatsimiititalialli ataatsimik nipeqarluni 2015-imi Aningaasaqarnermut Inatsimmi, nunalerinermi suliniutinut aningaasaliissutit qaffaagineqarnissaannik innersuussutaat Naalakkersuisunit isiginngitsuusaarneqarsinnaanngilaq. Taamaattumik tamatuma qanoq ililluni ukiuni aggersuni aningaasaqarnikkut atungassarititaasunut annertuumik ajorseriaataasusaaanngitsumik, aalajangersimasumik siunnersuusiornissaq Naalakkersuisunit sulissutigineqassaaq.

Nunalerineq pillugu ataatsimiititaliarsuup suliaanut tassanilu innersuussutaasunut Naalakkersuisut isummerumaarnissaat, aamma Aningaasanut inatsisissamut siunnersuusiornermut atatillugu suleriaatsimut atorneqartumut innersuussillutik siunnersuutip kiisalu ataatsimiititaliap inassuteqaataata ilanngullugu aningaasanut inatsisissap suliarinerani ilanngullugit Naalakkersuisut taamaalillutik suliaqarumaarput.